

DÉCLARÂTION D'ACSIDINT po l's-assûrances

Mossieû,

Vos m'avez d'mandé d' rimpli one déclârâcion d'acsidint. Dji m' vos va èspliquer comint qu' ça s'a passé. Mins d'avant di c'mincî, faut qui dj' vos dîye qu'on pout d'dja bin mârquer « Pont d' chance ».

Di m' mêtî, dji so scayeteû. Li djoû d' l'acsidint, dji bouteûve tot seû, à l' pure copète d'on batimint chîs plantchîs wôt. Quand dj'a yeû tot fait, là qui dj' veu qu'on m' aveûve monté one masse di panes di trop : deûs cint quatre vint trwès, qu'il è d'mèreûve.

Dji m' di è mi-min.me :

-Djan, ti n'as pus qu'one sôte à fé, c'èst d' lès rid'tchinde ! Ça fait qui dj' m'a atélé à l's-arindjî su l' monte-chârje, èt profiter qui l' poulye èsteûve co riloyîye à l' poutrèle d'à l' copète.

Po waîtî d' gagnî do timps, vèyan.mint qu' dj'èsteûve miërseû, dj'a fait tot m' possibe po n' fé qu'on còp l' vòye.

Dji n'aveu pus qu' à d'tchinde au pîd dè l' maujone. Apougnî l' cwade, m'î ragritcheter, diner on bon còp d'rins d' tos mès pus fwârts po dismacraler l' nuk, èt ramwinner l' kèdje à l' tère tot l' rastinant bin paujêremint.

Vos-auroz sûr lî su lès papîs do médecin dè l' bèsogne qui dj' pèse tot jusse swèssante yût kulos.

Mins lès panes, zèles, èlle è pèsin.n' po l' mwins' cint èt vint'.

Todi è-st-i qui dj' n'a nin compté deûs, èt qu' vo-m'-la rassatchî à l' copète, qu'on tchèt n'aureûve nin lèvé s' queue. Trop taurd po lachî l' cwade !

Dismètant qu' lès panes ditchindin.n', èt qui mi, dji monteûve, là qu' nos nos crwèsans, zèles èt mi, jusse come nos-arivin.n' au trwèsyin.me plantchî. C'èst là qu' dj'a stî poké.

One chance por mi, c' èst qu' ça a d'né on p'tit còp d' frin èt m' fé atèri à mitan chapé au chîjyin.me. Dji di « à mitan » pace qui m' drwète mwin s'aveut stî stichî ètur li poulye èt l' cwade.

Mins do timps qui dj' monteûve, à dadaye li monte-chârje rid'tchinde èt bèrloufer su l' dagn.

Lès trwès quârts dè panes sipiyîyes à miliârd di bokèts, èt foute on trayin d' tos lès diâles.

Tantia qu'avou l' vintin.ne di kulos qu'i lî d'mèreut d'ssu s' dos, rèvorer ècor on còp noste ome su lès d'zeûs. Èt mi l' fin parèy, mins d' l'ôte sins. Èt nos r'crwèser jusse come ènawêre, à l' min.me place, mins ç' còp ci è m' câssant trwès dints èt m' disfoncer deûs cwasses. Ça aveut tot l' min.me amôrti mi-y-atèrichadje su l' dagn qu'èsteut tot rascouvièt di spiyûres di panes. C'èst dandj'reû po ça qu' dj'ènn'a rèchu à bon compte : one fracture à m' gauche djigno.

Vo-m'-la dins lès cropècindes, ci còp ci, stauré fin long, come one cwârpèsse à plin solia.

Ti comprinds bin qui dj' n'a jamais pus stî sondjî à l' cwade, dwê, mi !

Tot d'on còp, come po-z-achèver s' bèsogne, là-t-i nin qu' nosse monte-chârje rabise dissur mi, èt m' vinu spotchî m' cofe, sins pont fé d'pus d'afaires qui si t' mètreus t' pîd su on lumçon !

Vola l'afaîre télé qu'èle s'a passé, dji vos l' pou garanti !

Mins ç' qui dj' vos v'leu surtout fé comprinde, c'èst qui v's-avez yeû l' chance qui dj' so-st-on solide galiârd ! Vos v' pôroz vanter d'awè passé pa on p'tit traou ! Avez tûzé rin qu' one sègonde à ç' qu'i v's-aureut yeû falu payî à m' veuve èt mès yût-z-ôrfèlins ?

Èt bin mi, siya ça, dj'î a tuzé. Èt dj' n'aureûve nin v'lu yèsse à vosse place !

Avou tos mès mèyeûs sintimints,

Djan li scayeteû.

Albert Delvaux

